



Nº EXPEDIENTE: 2025/SUBDIREC/000043

CONVENIO DE COLABORACIÓN ENTRE O CONCELLO DE PONTEVEDRA E A CLUB POOL PONTEVEDRA PARA A PROMOCIÓN DO DEPORTE DO BILLAR NO CONCELLO DE PONTEVEDRA NO ANO 2025

No Concello de Pontevedra na data que consta na sinatura electrónica

REUNIDOS:

Dunha parte, D. Miguel Anxo Fernández Lores, alcalde do Concello de Pontevedra, no exercicio das atribucións conferidas pola lexislación do Réxime e Administración Local.

Doutra parte, D. Damian Ramírez Estévez, co NIF 53****6P, actuando como presidente en nome e representación da entidade club pool Pontevedra (NIF G16970097), segundo resulta acreditado na documentación de representación que consta no servizo de deportes, asegurando a vixencia do seu cargo e das súas facultades para este acto.

Ámbalas dúas partes actúan nas representacións expresadas e recoñécense reciprocamente capacidade xurídica bastante para o outorgamento e formalización deste convenio e, a tal efecto

EXPOÑEN:

I. Atendendo ao disposto polos artigos 25.1 da Lei 7/1985, de 2 de abril, reguladora das bases de réxime local e 80.1 da Lei 5/1997, do 22 de xullo, de Administración Local de Galicia o Municipio, para a xestión dos seus intereses e no ámbito das súas competencias, pode promover actividades e prestar os servizos públicos que contribúan a satisfacer as necesidades e aspiracións da comunidade veciñal nos termos previstos neste artigo, exercendo en todo caso como competencias propias, nos termos da lexislación do Estado e das Comunidades Autónomas, nas materias de promoción do deporte e de instalacións deportivas e de ocupación do tempo libre. No mesmo senso, o artigo 8 da Lei 3/2012, de 2 de abril, do deporte de Galicia establece como competencia dos concellos, entre outras, fomentar e promover a actividade deportiva no seu territorio respectivo. Débese ter en conta tamén o disposto no artigo 43 da Constitución de 1978, cando estipula que: "Os poderes públicos fomentarán a educación sanitaria, a educación física e o deporte. Asemade, facilitarán a axeitada utilización do ocio".

II. Que entre os principais fins da entidade club pool Pontevedra figuran os concorrentes coas competencias municipais expresadas.

III. O Concello de Pontevedra fai un esforzo moi importante, dende os últimos anos, para a celebración no noso municipio de eventos deportivos de primeira orde no Estado español e a nivel internacional, coa finalidade de fomentar a participación deportiva entre a poboación e promover a súa imaxe.

En liña do recollido na memoria xustificativa achegada pola entidade beneficiaria, a promoción e o fomento do deporte de base así como a participación e organización de competicións son obxectivos primordiais, tanto do Concello de Pontevedra, especialmente o fomento do deporte de base, como da entidade solicitante. O billar, como deporte de precisión e concentración, experimentou un crecemento significativo en Pontevedra nos últimos anos afrontando a entidade solicitante unha limitación de capacidade nas súas instalacións xurdindo a necesidade de adquirir dúas novas mesas por: a) Incremento no número de deportistas que fai que a dotación actual resulte insuficiente para atender a demanda de adestramentos permitindo a ampliación de dúas mesas permitirá incrementar a capacidade para adestramentos simultáneos, reducindo as esperas e mellorando a calidade da





formación, e b) Organización de eventos e competicións, ao dispoñer de máis mesas homologadas poderase optar a organización de torneos de rango oficial (probos do circuíto galego, campionatos zonais, etc.) ao ser posible o desenvolvemento fluído da competición.

A práctica deportiva, caracterízase pola necesidade de contar cunha serie de materiais e equipamentos deportivos que permitan as condicións nas que os deportistas desenvolven a súa modalidade ou especialidade. A adquisición das mesas de billar pool americano (modalidade bola 8/9/10), cos correspondentes accesorios -lote de bolas, tacos de calidade e triángulos correspondentes, así coma que este material este homologado oficialmente- resulta imprescindible para o desenvolvemento tanto de adestramentos coma de competicións desta modalidade deportiva.

De conformidade co anterior, esta Administración considera de interese o outorgamento dunha axuda económica, por importe máximo de 6.000 euros, para a promoción do deporte do billar no concello de Pontevedra mediante o apoio na adquisición de dúas mesas de billar pool americano. Esta actuación ten por obxecto fomentar a práctica desta modalidade deportiva, facilitando o acceso da cidadanía a unha nova opción de actividade física que contribúe á mellora da mobilidade, o equilibrio, a cognición complexa e a saúde social nas persoas adultas, o que ven a xustificar a excepcionalidade esixida pola Ordenanza de subvencións do Concello en canto á porcentaxe da subvención a outorgar, propoñéndose que esta poida alcanzar ata o 70% do custe da adquisición das dúas mesas de billar pool americano, así como a imposibilidade de promover unha concorrencia pública da subvención.

IV. A subvención obxecto do expediente figura prevista co número de ficha con número de orde 2025/DEP/0005 dentro da area de competencia de deportes do Anexo I da actualización do PES para o ano 2025 (aprobada a través do Decreto de Alcaldía do 12.11.2025), pertencente ao Plan estratéxico de Subvencións do Concello de Pontevedra para os exercicios 2023-2025 e publicado no apartado de transparencia da sede electrónica do Concello de Pontevedra.

V. A tal fin, no marco das competencias en materia deportiva e de ocupación do tempo libre, segundo os artigos antes citados da Lei 7/1985 e da Lei 3/2012, e en desenvolvemento do plan estratéxico de subvencións para o trienio 2023-2025, este Concello comprometeu no seu Orzamento Xeral para 2025 a aplicación orzamentaria necesaria para asumir unha parte dos gastos de adquisición de material deportivo, en concreto, dúas mesas de billar pool americano.

VI. O convenio de colaboración resulta o instrumento xurídico habitual para canalizar as subvencións tramitadas polo procedemento de concesión directa, consonte ao establecido na actualmente vixente Ordenanza xeral municipal de subvencións, aprobada polo Pleno da Corporación na sesión do 17/09/2004 (BOP nº 190 do 30/09/2004), baixo a vixencia da Lei 38/2003, de 17 de novembro, xeral de subvencións e do Regulamento que desenvolve a anterior, aprobado por Real decreto 887/2006, de 17 de novembro, así como da Lei 9/2007 de subvencións de Galicia.

VII. O club pool Pontevedra (NIF G16970097) é a única entidade inscrita no rexistro de asociacións do Concello de Pontevedra que practica a modalidade de billar pool americano o que imposibilita a concorrencia con outras entidades deportivas. A entidade atópase inscrita no Rexistro de Asociacións Deportivas e Deportistas de Galicia co número C-14286 e no Rexistro Municipal de Asociacións do Concello de Pontevedra co número 569.

En base a canto antecede, as partes intervenientes acordan celebrar o presente CONVENIO DE COLABORACIÓN, que se rexerá con suxeición ás seguintes

CLÁUSULAS:

PRIMEIRA.- OBXECTO DO CONVENIO E ACTIVIDADE SUBVENCIONADA.

É obxecto do presente convenio establecer as condicións reguladoras da subvención directa de carácter nominativo, das previstas no artigo 22.2.a) da Lei 38/2003, de 17 de novembro, xeral de subvencións, que se outorga polo Concello de Pontevedra á entidade club pool Pontevedra (NIF





G16970097), para apoiar a adquisición de equipamento deportivo: dúas mesas de billar pool americano.

OBXECTO

O fomento da actividade deportiva como un elemento fundamental de desenvolvemento da cidadanía, contribuíndo a súa práctica á mellora das relacións sociais e ao incremento do benestar e da calidade de vida de quen o practica.

ACTIVIDADE SUBVENCIONADA E PERÍODO DE REALIZACIÓN

Actividade subvencionada	Data realización
Adquisición material deportivo: Dúas mesas de billar pool americano	Adquisición durante o ano 2025

A subvención outórgase de conformidade coas disposicións da Lei 38/2003, de 17 de novembro, xeral de subvencións (LXS) e do seu Regulamento, aprobado polo Real decreto 887/2006, da Lei 9/2007, do 13 de xuño, de subvencións de Galicia (LSG) e da Ordenanza xeral de subvencións do Concello de Pontevedra e os seus Organismos Autónomos (OXS), aprobada polo Pleno da corporación municipal, na sesión do 17/09/2004 (BOP nº 190 do 30/09/2004).

SEGUNDA.- IMPORTE DA SUBVENCIÓN E COMPATIBILIDADE CON OTURAS AXUDAS

O Concello de Pontevedra comprométese a achegar a cantidade máxima de seis mil euros (6.000,00 €), para colaborar nos gastos derivados da adquisición das dúas mesas de billar pool americano obxecto de subvención.

Debido ás especiais razóns de interese público e social que se xustifican no expediente tramitado para aprobación do presente convenio, a porcentaxe subvencionable poderá chegar ata o 70% do custe da adquisición das dúas mesas de billar pool americano.

A achega municipal efectuarase con cargo á partida do Orzamento Xeral do Concello que se detalla, tendo emitido informe a Intervención Xeral Municipal sobre a existencia de crédito na dita aplicación orzamentaria.

APLICACIÓN	OPERACIÓN CONTABLE	IMPORTE
05/3410/780.02	12025000072586	6.000,00 €
IMPORTE TOTAL		6.000,00 €

A subvención outorgada polo Concello é compatible con outras axudas, ingresos ou recursos públicos ou privados para a mesma finalidade. Neste caso, na xustificación da subvención deberá de acreditarse o importe, procedencia e aplicacións dos fondos percibidos á actividade subvencionada.

O importe da subvención en ningún caso poderá ser de tal contía que, illadamente ou en concorrencia con subvencións ou axudas doutras administracións públicas ou doutros entes públicos ou privados, supere o custo total da actividade subvencionada.





TERCEIRA.- OBRIGAS DA ENTIDADE BENEFICIARIA

A entidade club pool Pontevedra (NIF G16970097) está obrigada ao cumprimento das obrigas establecidas no artigo 14 da LXS, no artigo 11 da LGS e no artigo 7 da OXS, e a realizar os seguintes compromisos:

1. A entidade beneficiaria comprométese a destinar a subvención ao desenvolvemento da promoción do desenvolvemento do billar a través da adquisición de dúas mesas de billar pool americano e está obrigada a destacar en lugar preminente a colaboración económica do Concello de Pontevedra, tanto no propio material subvencionado, como en folletos, carteis, informacións, material e documentación da actividade en xeral.

2. A colaboración do Concello de Pontevedra límitase á achega da subvención comprometida. Esta Administración está eximida de calquera responsabilidade civil ou de calquera tipo que poida derivarse da utilización das dúas mesas de billar pool americano obxecto da subvención.

Consonte co disposto nos artigos 22 e 23 da Lei 3/2012, de 2 de abril, do deporte de Galicia, a entidade beneficiaria, como organizadora en exclusiva do evento deportivo, deberá subscribir obrigatoriamente un seguro para o suposto de accidente deportivo e un seguro de responsabilidade civil polos danos que se lles poidan ocasionar ás persoas usuarias, a participantes e a calquera outra persoa, como consecuencia das condicións das instalacións ou da actividade desenvolvida nelas.

3. A entidade beneficiaria deberá comprometerse a manter en bo estado o material subvencionado no patrimonio da entidade como mínimo durante cinco anos. No caso de que o ben subvencionado sexa obxecto de transmisión dentro dos cinco anos, o beneficiario deberá de reintegrar a subvención, a non ser que a transmisión fora aceptada e autorizada por escrito polo Concello de Pontevedra.

4. Ao abeiro do disposto no artigo 31 da Lei 38/2003 xeral de subvencións, cando o importe do gasto subvencionable supere as contías establecidas na Lei 30/2007, de 30 de outubro, de Contratos do Sector público para o contrato menor (a data, considéranse contratos menores os contratos de valor estimado inferior a 40.000,00 euros, cando se trate de contratos de obras, ou a 15.000,00 euros, cando se trate de contratos de subministro o de servizos), deberán de solicitarse como mínimo tres ofertas de diferentes provedores. A elección entre as ofertas presentadas, que deberán de achegarse no seu caso na xustificación, realizarase conforme a criterios de eficiencia e economía; no caso de elixir a oferta menos vantaxosa dende o punto de vista económico, deberá de xustificarse esta circunstancia expresamente nunha memoria. Exceptuarase este requisito para o caso de que o gasto se tivera realizado con anterioridade á concesión da subvención ou cando no mercado non exista un número suficiente de empresas coas que contratar polas especiais características do gasto.

5. De conformidade co artigo 33 da Ordenanza de impulso do uso do galego no Concello de Pontevedra, as publicacións, os carteis, a publicidade e toda produción escrita das actividades da asociación beneficiaria da subvención deberá estar en lingua galega.

6. A entidade beneficiaria someterase ás actuacións de comprobación e control financeiro que efectúe o órgano outorgante da subvención ou calquera outro órgano competente, achegando canta información lle sexa requirida.

Nomeadamente, e no exercicio das funcións de fiscalización e control do destino dos fondos públicos, a entidade beneficiaria está obrigada a facilitar canta información lle sexa requirida pola Intervención Xeral do Concello, polo Tribunal de Contas e polo Consello de Contas de Galicia. Neste senso, a súa actuación estará sometida á esixencia de responsabilidade contable nos termos e co alcance que determine, no seu caso, o axuízamento dos anteriores órganos.

CUARTA.- GASTO SUBVENCIONABLE

1. Consideraranse gastos subvencionables aqueles que de maneira indubidable respondan á natureza da actividade subvencionada e se realicen con anterioridade á finalización do período de





xustificación.

Considérase unicamente como gasto subvencionable o derivado da adquisición de dúas mesas de billar pool americano.

O IVE soportado, que deberá de constar desglosado, será subvencionable cando o beneficiario non poida deducilo, recuperalo ou compensalo.

QUINTA.- XUSTIFICACIÓN DA SUBVENCIÓN

Segundo o artigo 34.3 da Lei 38/2003 o pago da subvención realizarase previa xustificación pola beneficiaria da realización da actividade, proxecto, obxectivo ou adopción do comportamento para o que se concedeu, nos termos establecidos na normativa reguladora da subvención. O procedemento rematará coa resolución que aprobe a xustificación da subvención do Concello.

A entidade beneficiaria está obrigada a presentar a conta xustificativa da subvención con aportación dos xustificantes de gasto consonte co establecido no artigo 72 do Regulamento da Lei xeral de subvención, aprobado polo Real Decreto 887/2006, de 21 de xullo.

A conta xustificativa presentárase a través de medios electrónicos na sede electrónica do Concello de Pontevedra (<http://sede.pontevedra.gal/>) ou en calquera dos rexistros electrónicos previstos no artigo 16.4 da Lei 39/2015, do 1 de outubro, do procedemento administrativo común das Administracións Públicas.

A xustificación do cumprimento das condicións impostas e da consecución dos obxectivos previstos no acto de concesión da subvención realizarase mediante a presentación da conta xustificativa segundo o disposto no artigo 30 da LXS e no artigo 19 da Ordenanza Municipal que regulan a xustificación das subvencións públicas.

En todo caso, o prazo para a rendición da conta xustificativa non poderá exceder de tres meses dende a sinatura do convenio.

A presentación da conta xustificativa fóra do prazo establecido constitúe unha infracción leve, ao incumprir as obrigas establecidas na normativa reguladora das subvencións públicas, e dará lugar á imposición das sancións previstas legalmente.

A modalidade de xustificación será a de conta xustificativa con aportación de xustificantes do gasto, debendo de presentar a seguinte documentación

- Solicitud de pagamento no modelo normalizado facilitado polo Concello.
- Memoria de actuación xustificativa do cumprimento das condicións impostas na concesión da subvención, con indicación das actividades realizadas/da actividade realizada e dos resultados obtidos.
- Unha memoria económica xustificativa do custo do programa subvencionado, que incluirá:
 - Relación clasificada dos gastos e investimentos das actividades/da actividade, con identificación do acredor, do documento, o seu importe, data de emisión e, no seu caso, data de pago. No caso de que a subvención se outorgue con arranxo a un orzamento estimado, indicaranse as desviacións acaecidas.
 - As facturas ou documentos de valor probatorio equivalente no tráfico xurídico mercantil ou con eficacia administrativa incorporados na relación a que se fai referencia no punto anterior e, no seu caso, a documentación acreditativa do pago.
 - Os tres orzamentos que, en aplicación do artigo 31.3 da Lei Xeral de Subvencións, deba de ter solicitado o beneficiario. A elección entre as ofertas presentadas realizarase





conforme criterios de eficiencia e economía, debendo xustificarse expresamente nunha memoria a elección cando non recaia na proposta económica máis vantaxosa. No caso de concorrer algunha das excepcións a esta obriga que permite o artigo 31.3, deberá de presentarse unha memoria asinada pola representante da beneficiaria no que se acredite esta circunstancia.

- Un detalle doutros ingresos ou subvencións que financien as actividades/a actividade subvencionada con indicación o importe e a súa procedencia.
- No seu caso, carta de pago de reintegro no suposto de remanentes non aplicados así como dos xuros derivados dos mesmos.
- Documentación xustificativa da subscripción dos seguros obrigatorios previstos nos artigos 22 e 23 da Lei 3/2012, do deporte de Galicia.
- Documentación que acredite a publicidade por parte da entidade beneficiaria do financiamento da actividade polo Concello de Pontevedra (folletos, dípticos, carteis, etc.)

As facturas xustificativas da subvención deberán cumprir os requisitos establecidos no Regulamento polo que se regulan as obrigas de facturación, aprobado polo Real Decreto 1619/2012, estarán datadas no período subvencionable e conterán o selo de pagado ou xustificación documental que acredite o seu pago.

Deberá indicarse pola beneficiaria a data da realización do pago e, no caso de que este non poida acreditarse coa conta xustificativa, a entidade beneficiaria deberá de comunicar ao Concello a realización do pagamento no prazo de 10 días dende o abono da subvención pola Tesourería Municipal.

Segundo o artigo 7.1 da Lei 7/2012, de 29 de outubro, de modificación da normativa tributaria e orzamentaria e de adecuación da normativa financeira para a intensificación das actuacións na prevención e loita contra o fraude na súa redacción dada pola Lei 11/2021, de 9 de xullo, de medidas de prevención e loita contra o fraude fiscal, de transposición da Directiva (UE) 2016/1164, do Consello, de 12 de xullo de 2016, pola que se establecen normas contra as prácticas de elusión fiscal que inciden directamente no funcionamento do mercado interior, de modificación de diversas normas tributarias e en materia de regulación do xogo. (BOE núm. 164, de 10 de xullo de 2021) non poderán pagarse en efectivo as operacións de importe igual ou superior a 1.000,00 €, polo que, o pagamento destas operacións deberá de realizarse pola beneficiaria por algún medio de pago distinto ao efectivo, debendo conservar os xustificantes do pagamento, durante un prazo de cinco anos dende a data da súa realización, aos efectos de acreditar a realidade do mesmo.

SEXTA. PUBLICIDADE E DIFUSIÓN DA SUBVENCIÓN

A entidade beneficiaria deberá dar publicidade da subvención concedida polo Concello e do carácter público da financiación da actividade.

De acordo con isto, deberá de destacar en lugar preeminente a colaboración económica do Concello de Pontevedra, na documentación da actuación, nas informacións, materiais e anuncios de difusión da actividade que realice e tamén na páxina web e nas redes sociais do evento, de acordo coa imaxe corporativa do Concello de Pontevedra.

SÉTIMA.- COMPROBACIÓN DA SUBVENCIÓN

No exercicio das funcións de fiscalización e control do destino dos fondos públicos, a entidade beneficiaria está obrigada a facilitar canta información lle sexa requirida pola Intervención Xeral do Concello, polo Tribunal de Contas e polo Consello de Contas de Galicia.

Neste senso, a súa actuación estará sometida á esixencia de responsabilidade contable nos termos e





co alcance que determine, no seu caso, o axuízamento dos anteriores órganos.

OITAVA.- ÓRGANO DE SEGUIMENTO, VIXILANCIA E CONTROL DA EXECUCIÓN DO CONVENIO

Para o seguimento das actuacións previstas e a solución de calquera controversia que xurda en canto á interpretación dos termos do presente convenio, constitúese unha Comisión de Seguimento integrada polo alcalde ou concelleiro/a no que delegue e o presidente da asociación.

NOVENA.- MODIFICACIÓN DO CONVENIO

En todo caso, a modificación do contido do convenio requirirá o acordo unánime das partes asinantes do mesmo.

DÉCIMA.- VIXENCIA E CAUSAS DE EXTINCIÓN

O presente convenio de colaboración entrará en vigor no intre da súa sinatura e a súa vixencia estenderase ata o 31 de decembro de 2025.

Serán causas de extinción deste Convenio:

1. O transcurso do prazo da súa vixencia e a realización do seu obxecto.
2. O acordo unánime das partes asinantes.
3. O incumprimento das obrigas e compromisos asumidos por algunha das partes.
4. Por decisión xudicial declaratoria da nulidade do convenio.
5. Por calquera outra causa distinta das anteriores prevista na lei.

O incumprimento do obxecto, actividades e compromisos establecidos no convenio por parte da entidade beneficiaria dará lugar á incoación do expediente de reintegro da subvención, ademais da imposición das sancións que, no seu caso, resulten oportunas.

UNDÉCIMA.- NATUREZA, RÉXIME XURÍDICO E XURISDICIÓN COMPETENTE

O presente convenio ten natureza administrativa e rexerese pola Lei 38/2003 e o Real Decreto 887/2006 nos seus preceptos básicos; a Lei 40/2015; a lexislación básica do Estado en materia de réxime local; a Lei 9/2007; os preceptos non básicos da Lei 38/2003 e do Real Decreto 887/2006; polos pactos que se conteñen neste convenio; polas Bases de Execución dos orzamentos do Concello de Pontevedra e polas restantes normas de dereito administrativo, e no seu defecto, as normas de dereito privado.

Así mesmo, a falta de entendemento previo pola Comisión de Seguimento, as partes quedan sometidas á xurisdición contencioso-administrativa na resolución de posibles controversias que puideran suscitar o incumprimento ou a interpretación do convenio.

DUODÉCIMA. PROTECCIÓN DE DATOS DE CARÁCTER PERSOAL

O Concello de Pontevedra obrígase a cumprir o Regulamento (UE) 2016/679 Xeral de Protección de Datos (RXPD) e a Lei Orgánica 3/2018 de Protección de Datos Persoais e garantía dos dereitos dixitais (LOPDGDD).

RESPONSABLES DO TRATAMENTO: Concello de Pontevedra (P3603800H) e a club pool Pontevedra (G16970097).





FINALIDADES DO TRATAMENTO: A xestión do Convenio;

LEXITIMACIÓN PARA O TRATAMENTO: Relación contractual en base ao Convenio establecido (artigo 6.1,b do RGPD) e o exercicio dos poderes públicos conferidos ao Responsable (artigo 6.1,e do RGPD).

DESTINATARIOS DOS DATOS: As Administracións Públicas no exercicio das súas competencias, cando sexa necesario para a xestión do Convenio;

PRAZO DE CONSERVACIÓN: Os datos proporcionados conservaranse durante o tempo necesario para cumprir coas obrigas legais do Responsable.

EXERCICIO DE DEREITOS: As persoas interesadas poderán solicitar o acceso, rectificación ou supresión dos seus datos, así como exercitar outros dereitos ou retirar no seu caso o consentimento outorgado a través da sede electrónica na sección "[Dereitos sobre Protección de Datos](#)";

CONTACTO DELEGADO DE PROTECCIÓN DE DATOS E INFORMACIÓN ADICIONAL:
dpd@pontevedra.eu

En proba de conformidade, as partes asinan o presente convenio, no lugar e data ao principio indicados, quedando un exemplar en poder de cada unha delas.

